



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8



India-Brazil tsungda sen bn. 20
jenjang shishilembatsü: PM Modi



Neymar taküm küm
tatemlen asaya nungi anentsü akok

VOL. XXIII ISSUE NO. 130 (ADOK 130) DIMAPUR AMUNGNÜ (SUNDAY) TSÜKLAI (FEBRUARY) 22, 2026 ₹ 5.00

ANATG-2015 batch-i lungkak aitba anena atar

Kohima, February 21, 2026 (TYO): ANATG-2015 Batch-i lungkak aitba anena atatsü telemteba agiogo, ajiüsüka parnoki June 30 tashi nung tesayur 1166 regularize asütsü züngzüksüogo.

Honibarnü ANATG-2015 Batch Core Committee aser züngsemtem mapang talangka agia olemtepa sülen iba lemtet agiogo.

Directorate of School Education tenüing nung Principal Director, Shashank Pratap Singh-i Brihostibarnü shidi ka züluba nung khen atema lungkak aitba anena atatsü mepishia liasü aser Core Committee-i ibaji mulunga agizük.

Principal Director indang shidi nung tesayurtem indang khuret aser timtem angatetba shia liasü. Iba teblemstü ya departmental level nung süiki ia bilema inyaker ta paisa ashi.

Bangdakpur den amalitepa nungdakba kulikakettem meyipa repringshir aser bushitepdar. Sanction post order numbers, appointment orders aser release orders menguteter aser iba ajanga tanga lenmangtem bushidar ta

DoSE-i ashi.

ANATG-2015 Batch-i lungkak aitba anena ataba ya takhangba meyipa agienba masü saka June 30 tashi nung regularization maparen ajak tembangtsü atema lir ta metetdaksüogo.

ANATG-2015 Batch kübok shimokba tesayur 1166-i küm aika regularization atema atayonga arur. Tesüiba mapang parnoki lungkak aйдang sorkari High Powered Committee ka tenteter December 2023 tashi nung inyaksü nanzükka liasü.

Sorkari nangzükba amaji mapang telatet ka tsungda onok mapa regularize asütsü. Onok mapang peria dang agütsür saka iba mapang tsungda meinyakra mapa tesashiba inyaksü ta ANATG-2015 Batch-isa metetdaksüogo.

Honibarnü senden nung züngsemtemi Core Committee lenisüba nung temulung alemba metetdaksü aser parnok külemi longjemer alizüing atongtsü nangzüktepa liasü.

Parnokisa Directorate of School Education den maneni olemtepa maparen ajak tiptema inyaksü nangzüktepa.

Union MoS Bambhaniya-i Nagaland semdangogo

Dimapur, February 21, 2026 (TYO): Prime Minister Narendra Modi-i Northeast state tem renloksü atema temulung kanga agüja inyaker ta Union Minister of State for Consumer Affairs, Food & Public Distribution, Nimuben Jayantibhai Bambhaniya-i ashi.

Union Minister Nimuben-i anogo asemnü Nagaland semdangba sülen osangbener den jembidang Centre-i Northeast nung temulung kanga agütsür ta ashi.

Centre sorkari Northeast state tem ya 'Atmanirbhar' (self-reliant) kümdaktsünür. Iba atema nübor shia dangi sorkar schemes atongtsü atema meranger ta lai ashi.

Nagaland nung alirtemi 'Vocal for Local' mantra agizüksüla. Dimapur nung indigenous sectors nung Make in India tangatetba sayutsüla, talisa handicrafts, handlooms aser agricultural produce nung merangtsüla ta laisa ashi.

Skill development ajanga NE lanurtem aser tetsürtem tashi itdaktsür aser senso ajaki

Nagaland ya fully developed state ka akümtsü atema shilem agütsü ayongzükta ta MoS Bambhaniya-i ashi.

Khonoma aser Kuda semdang

Bambhaniya-isa February 21, 2026 nü Khonoma Village, Kohima aser Government Middle School, Kuda village Dimapur semdanga liasü.

Bambhaniya-i Khonoma semdangdang Archaeological Survey of India nungshilung nung tetushi agütsü. Iba nungshilung ya Khonoma Battle 1879 mapang G.H. Damant aser tangartem taküm samaba atema bendanga agüja yangluba lir.

MoS Bambhaniya-isa chiyungtsü aser osettsüsettem ayokba local stalls semdanga liasü.

Khonoma Fort (Semoma) nung Bambhaniya-i yimtsüing lenirtem den ajurutepa sensaksem. Idangji Village Chairman-i itashia sorkar kübok ration teti atonger aser iba atema Prime Minister dang pelar ta ashi.

(Maneni tapak 8 nung...)

Dimapur nung Alikintem Tetsü Oshi Anogomung amung



Osang Tajung ken tentepba nung mezüing takok jenjang angur lanurtem aser Zülumen Shitet toktep nung shilem agir tanurtem noksa nung angur.

Dimapur, Feb.21 (TYO) : Dimapur nung tanü Tsüklai 21, Küptoknü Dimapur Watsü Telungjem aser Ao Kaketshir Telungjem Dimapur nati "Alikintem Tetsü Oshi Anogomung" sentong tajung ka "Oshi aika meteta jembiba nung Lanurtem Ola" omen nung amendaker ayongzükka mungogo.

Iba sentong nung akhümdong, Wt. Aotula Imchen IPS, Commisisoner of Police, Dimapur-i jembidang, iba ama alima ajunga nung amungba Tetsü Oshi Anogomung ya talisa asenok ama kin Dimapur, Chümoukedima aser Niuland district-tem nung alirtem asoshi asen tsürabur senmang aser sobaliba tajung mesamadaktsü kati ka den angazüktepa amongtsübaji kanga tongtibang

ta sentong ayongzükertem dang pelaba ashidang metetdaksü.

Laisa iba sentong nung adener, talisa, lanurtem dang pei tetsü oshi ya pei kin aser sobaliba ayak ta meteta mesamadaktsü angazükka jembitsü ajungshi. Nisung kati pei oshi jembitetba, züngtetba aser zülutetbaji kanga nümadanga bilemstüla aser joko tanü putu nungbo joko asenoka AI amshia asen oshi-a information technology amshiba nung aeintsü nungdaker, iba jagiang tanur aser lanurtemi asen oshi melamelaa angazüktepa ta laisa metetdaksü.

Iba sentong tetenzüklen, DWT tir Wt. Kenyangerla-i tepela o den anogomung tetezü metetdaksü aser Ao Senso Telungjem Dimapur nung tir Wb.Ningsangwaba-i Ao oshi

tajungba nung renloka aotsü atema ano telok ajak longjemer küm shia sentong tuluba ayongzükka aotsü ajungshi.

Iba sentong nung tanurtem rongnung Zülumen Shitet (Spelling Bee) toktepba aser lanurtem rongnung Osang Tajung ken Züingdangba 441 tentepba mapang liasü.

Iba sentong nungsa Dimapur Ao Lanur Telongjem tir-i sentong ayongzükertem dang pelaba metetdaksü aser Ao Kaetshir Telungjem Dimapur tir-i shilem agirtem ajak dang pelaba metetdaksü.

Iba sentong ya Sümedem Fellowship, DABA, Lengrijan, Dimapur nung DABA nung tetsür tesayula Amongla Aier-i sarasadema tenzük aser telok ajaki sarasadema takok nung tembang.

AKM 2026-2029 kümsük asoshi ketdangsürtemi menden agizükogo

Mokokchung, 21st FEB (TYO): Ao Kaketshir Mungdang ketdangsür tejen, tasen menden melentepba sentong ka Feb 21 nü AKM conference hall nung temenungratsüka agiogo.

Kulizüing agiba aser menden melentepba mapa taoba AKM tir & Obendanger Luden Züngsem, Aodangnok Ozüküm-i ketdang süa agi.

AKM tir menden toktsür Lanutoshi Aier-i jembidang, pa aser par külem ketdangsürtemi kaketshir tejakleni anitsü asoshi akokba tashi maparen balala inyaksü merangogo, iba nungji tajung kar inyaka lishia lanlia Tsüngrem nem tenüingsang agütsür, saka ano metokmeperi mesüra tashimait kar danga inyaka lira tang team tasenpuri itemji metongshia tajungba

inyaksü merangang, ta ajungshi.

AKM kübok kongsang/luden kwika lir aser AKM meimertem shirnokisa nübu, rongsen den shisatsü aser sarasadem agi nungita yaritepogo, parnok ajak dang pelar, ta pai metetdaksü. "Nenoki nungita yariba ajanga tanü AKM taküm alir, anungji, ajak dang pelar aser ano maneni teti yamai yaridaktsünür", ta paisa mepishia ashi.

Tang team tasenba ya AKM centenary dak rangloker shimba lir, anungji, nenok team ya khuret tuluba ajurutsü, aji oda, nüburi imlaba ama tajungtiba nung tenzüksü ajungshir, ta ashi. AKM sabang ya temoatsüa sabang tulu, saka yamaji khuret-a tulu lir, anungji, itemji angateta tenzüksü paisa ayongzük.

AKM tir menden agizüksang

Lanulemba Longchar-ia mapang tatsüka agidang, Ao kini pa nem yimli aser maangka tulu agütsüba asoshi pelaba den taoba kümsük mapang koda tejenpur den yaritepa aru, kasaji par kümsük nunga nüburtem nungi teyaritep aser amalitep akanger, ta mepishia metetdaksü.

Iba sentong nung Rionsanger Putu Menden Mokokchung Village, Chairman, L. Mapu Lkr-i tajungshi o jembidang, pei ayak aser sobaliba metetba den Tsüngrem tsüngkentsüba, anembonga, pur tsüngta kadi ka akümtsübutepa, tejenpur mamatoki maparen ajak nung amalitepa aser pei ajungtsü atema masü saka songjen lirumedemtsü tangatetba nung ketdang süa aotsü ajungshi.

(Maneni tapak 8 nung...)

C-Edge College nung international tetsü oshi anogomung mungogo



Dimapur, Tsüklai/February 21 (TYO): C-Edge College, Chumoukedima nung Alima ajunga nung tetsü oshi anogo den repsema Cultural-cum-Literary Day February 19 aser 20 nü mungogo.

Iba sentong ya "Youth Voices on Multilingual Education," omen nung ajemdaker agi, aser iba ajanga kaketshirtem nem pei tetsü oshi agizüktetsü asoshi tashi agütsüogo.

Sentong ya GK Auditorium nung English Department-i Aoer tar nung otsü nungi Jina aser Etiben na otsü jilushi ka ia

sayua tenzüka liasü. Omen dak ajemdaker Quickserv nung Business Lead Neelam Kushwaha-i o jembib, shibai tetsü oshi ya maitsü wazüka ayutsü aser innovation atema kanga tongtibang lir ta ashi. Laisa, oshi aika ashiba ajanga alima kübok tesem balala nung mapa inyaksü atema maangka tali angutsü. Kushwaha-i lanurtem dang globalized lima ka nung pei tetsü oshi ya pei taküm renloka aotsü aser pei mapa nungi takok ngua aotsü atema tongtibang hadir ka ama agitsü ajungshia liasü.

Anogo ana tsüingda olangtepba, quiz, jeptak o jembiba amala tetoktepba balala den sangro züingtepba aser sobaliba ken atenba amala sentong balala agia liasü.

Maneni tayang khattepba, nület metsütepba, ola agütsütepba amala sobaliba asaya balala asayaba den sobaliba sobosolemtsü sayaba sentong ka agia liasü.

Sentong ya Bengali nung sobaliba tsüingda ka sayaba den tetoktepba 14 nung takokertem nem tetushi agütsüba sülen tembanga liasü.

Peren DC-i senzusenpongtsü tetuyuba agütsü

Dimapur, Tsüklai/February 21 (TYO): Peren Deputy Commissioner Hiazu Meru-i, District Hq, Peren aser Jalukie Pungchi na tsüingda tang lenmang yangluba den geo-grid installation mapa

benoka inyakdar asünung iba lenmang nung February 21 nungi gari tulutem mesenzüdaktsütsü ta metetdaktsüogo.

Ajisüaka tenokdangba küboki construction firm

indang garitembo maittsü.

Tening Sub-Division nungi oli aruli ta senzüba gari tulu ajak dang tenokdangba agütsür aliba mapang Peren Town - Jalukie lenmang amshitsü metetdaktsüogo.

Chümoukedima nung azüngen benjung mungogo

Dimapur, Tsüklai/February 21 (TYO): Angh Hall, Agri Expo, Chümoukedima nung "From Field to Feast: Celebrating Our Soybean Legacy" omen nung ajemdaker anogo ana atema azüngen benjung February 20 nü tenzüko. Iba sentong yagi state kübok tesem balala nungi aluyimer, entrepreneur, scientist aser stakeholder atsüa aruogo.

Iba benjung ya TSP and NEH components, School of Agricultural Sciences (SAS), Nagaland University, Medziphema Campus kübok ICAR-AICRP-i ayongzüka liasü.

Sentong nung Dr. G.P. Singh, Director, ICAR-NBPGR, aser Sanuzo Nienu, Director of Agriculture, Government of Nagaland nati rongsenketzüng terenlok aser nutritional security atema azüngen ya koda tongtibang küma odar iba indang lemsatepa liasü.

Sentong nung o jembiba mapang Director of Agriculture, Government of Nagaland Sanuzo Nienu-i, azüngen (Glycine max) ya leguminous crops rong sentiba

ka lir, koba protein aser totzü agi sünga lir aser food security atema iba ya kanga tongtibang lir, ta ashi. Paisa, azüngen ya meimchi achitsü atema protein aika aketba chiyongtsü dang masü saka shiruru aser an atema chiyongtsü yangluba nunga kanga tongtibang lir ta ashi.

"Azüngen ya tarutsü chiyongtsü lir. Iba ya temulungjang, teret, metabolic function aser blood sugar level atema kanga tongtibang lir. Iba yagi ano aluyimba rongsenketzüng tashi itshidaktsür," ta pai ashi.

Azüngen ya tzü mopung atema koda tajangzük iba indang jembiba mapang pai, azüngen yagi symbiotic bacteria ajanga atmospheric nitrogen yanglushija ali temo taliba kümdaktsür, aser iba ajanga synthetic fertilizers dak metalokba tajemba kümdaktsür aser tanga tsünusenpongtsü atema ali tajungba kümdaktsür, ta ashi.

Sentong nungsa Department of Agronomy, SAS, Nagaland University nungi Prof. L. Tongpang Longkumer-i, scientific advancements aser Nagaland

tsüingkü mongpu dak apet azüngen metsü amshitsü koda tongtibang iba indang lemsatep. Pai, azüngen tsünüba ajanga ali tajungba kümdaktsütsü, aluyimertem sen timba aazüktetsü aser state ajunga nung nutritional security ajungkettsü ta ashi.

Alima ajunga nung iba chiyongtsü ya koda tongtibang iba indang jembiba mapang Prof. Longkumer-i, azüngen ya "wonder crop," ka ta ashi, koba ajanga alima ajunga nung tongtibang shilem agir aser oilseed sector shilem 50 jungnüa iba yagi ayimjemer ta ashi. India nung azüngen ya mezüingbuba 1970s nung bener aru aser iba sülen linük nung oilseed crop tongtibangtiba rongnung tanabuba kümoggo.

Maneni benjung nung o jembirtemi azüngen alu tululu ayimtsü atema ajungmesotsü nungdakba, metsü tajungba agütsütsüba aser azüngen agi yangluba chiyongtsü balala yanglutsü atema processing unit tem amenoktsü nungdakba lemsatepa liasü. Parnokisa, tangazükba shitak agütsüba den shishilembadak balala den kanga junga sendakteptsüra

PHED-i Kohima nung tzü pipe raksaba indang metetdaktsü

Dimapur, Tsüklai/February 21 (TYO): Public Health Engineering Department (PHED)-i sangdong ka ajanga Kohima municipal kübok alirtem dang D Block nung LG Showroom anasa pipe mainline raksaba ajanga tzü marur ta shiogo.

Anungji anogo ishika atema Phoolbari, Midland, D Block, New Market, Naga Bazar, Kitsubozou, Kezekie, Themezie, L Khel, Krouliezou, Bayavü, High School, aser Secretariat temeket nung tzü marutsü ta

metetdaktsüogo.

PHED Kohima urban division SDO, Er. Ahito K Awomi-i, pipe line raksar aliba ya takaratiba nung yanglutsü asoshi department-i takok tashi inyakdar ta ashi.

Iba dak sendakba nung tzü pipe line raksaba agi kongshir aliba kibongtem dang anogo ishika atema aremzüka atatsü metetdaktsüogo. Department-isa, takaratiba nung pipe line yanglutsütsü atema takokba tashi jenjang agitsü tenangzükba agütsüogo.

Jaluki nung PM Vishwakarma indang Workshop agi

Dimapur, Tsüklai/February 21 (TYO): PM Vishwakarma dak sendakba nung Awareness Workshop ka February 20 nü District Industries Centre (DIC), Peren-i ayongzüka Dobashi Customary Court, ADC Office, Jalukie nung agiogo.

Entrepreneurship, marketing, digital formalisation aser financial literacy dak sendakba nung artisan aser beneficiary tem nem tangazükba tali agütsütsü nükjidong nung iba workshop ayongzüka agiogo.

Sentong nung o jembiba mapang General Manager, District Industries Centre (DIC), Peren, Kughato Sema-i, iba scheme ya koda tongtibang aser iba nükjidong ya kechi aji lemsatepa liasü. Paisa, artisan tem nongita yaritsü aser parnok libaliro jenjang ajungkettsütsü atema design süa yangluba

provision aser tajangzük balala indang rasa ashi.

Pai, sentong nung shilem agirtem dang iba scheme nung züingoksemtsü, nendaka aser bendanga agüja inyaksü aser senotsü teyari agütsüba takok tashi agitsü ajungshia liasü. Kughato-isa, ajaki bendanga agüja inyakba aser scheme shitak benoka inyakba ajanga scheme takok ngua benoka inyaktetsü, ta ashi.

Sentong nung EAC, Jalukie, Sizin Renttah-ia o tatsüka jembiba mapang, local craftsmen aser entrepreneur tem dang pei ropngsenketzüng jenjang yanglushitsü atema PM Vishwakarma iba dak sendaka aliba inakyimtemi agütsüba maangka ya agitsü ajungshia liasü.

Kasa mapang nung Functional Manager, DIC, Peren, Namziulung Pamai-i, Ministry of MSME aser state sorkar kübok financial scheme tem dak sendakba nung osang tejangja agütsü. Pamai-isa teyari balala agitetsü aliba aser support mechanism tem indang metetdaktsü.

Maneni DFS (Non-Farm Livelihoods), DMMU, Peren, Amos Newme lenisüba nung marketing, branding, advertising aser packaging indang session ka agi, koba oset ka jenjang tajungba kümdaktsütsü aser shishilemba dak tonga otetsüba dak rangloker liasü.

Field Officer, SBI Jalukie Branch, Lipoklemba Pongen-i, financial literacy aser bank dak sendakba ken o balala indang tangazükba agütsü, kong senotsü amshiba yimya aser bank-i service balala agütsüba densema liasü.

Sentong nungsa Financial Analyst, RAMP Scheme, Kezhono-i, Udyam Registration kübok PM Vishwakarma beneficiaries nung züingoksema tajangzük aser QR Code integration indang rasa ashi.

Sentong ya Consultant, State Programme Management Unit, PM Vishwakarma, Suneptula lenisüba nung PM Vishwakarma dak sendakba nung sensaksem sentong ka agiba sülen tembanga liasü, kong sentong nung shilem agirtemi ken o mejangjabatem asüngdanga liasü.

India-Brazil tsüngda sen bn. 20 jenjang shishilembatsü: PM Modi



February 21, 2026 nü New Delhi nung Brazil Tir, Luiz Inacio Lula da Silva aser Ato kilonser, Narendra Modi nati osangbenertem den jembidang tangokba noksa nung angur.

New Delhi, Tsüklai/February 21 (Agencies): Honibarnü Hyderabad House, New Delhi nung Ato kilonser Narendra Modi aser Brazil Tir, Luiz Inacio Lula da Silva na senden amenba sülen tenati osangbenertem den jembidi.

Global South nung aliba tongti linük ana tsüngda lenla balala nung taliba amalitepa inyaktsü atema lenir anati jembidiogo.

Osangbenertem den jembidang Ato kilonser Modi-i, linük ana tsüngda tesendaktep ya arok takok partnership ka lir, aser taruba küm pongu tsüngda linük ana tsüngda dollar sen billion 20 dak tali jenjang shishilembatsü, ta metetdaksü.

"Tanü o lemtepa mapang nung künati arok taginüba ataloktsü atema lenla ajak nung taliba amalitepa inyaktsü atema jembidiogo. Latin America nung India atema shishilembaba partner linük tulutibaji Brazil lir. Taruba küm pongu nung linük ana tsüngda dollar sen billion 20 dak tali shishilembatsü. Linük ana tsüngda shishilembaba ya

züngya ka dang masü saka iba ya tamang katetba temaitsü lir," ta pai metetdaksü.

"Linük ana tsüngda defence sector nung amalitepa inyakba jenjang tajungba kümдар. Iba ya tamang katetba aser asalentong tsütsü amalitepa inyakba tatishitsü lir," ta paisa metetdaksü.

Linük ana tsüngda healthcare aser pharmaceuticals sector nung ano taliba amalitepa inyaktsü maongka lir; India-i jenjang dalang agi mozü quality tajung balala Brazil nem agütsütsü aser Ayurveda den sobaliba mozü-a ajungketsütsü, ta paisa shisem.

Kasa osangbenertem senden nung Brazil Tir Lula-i, "Linük ana ya Global South nung democracy linük tulutiba ana dang masü saka alima nung tongti pharmacy ana lir aser renewable energy tashi tulu aliba linük ana lir," ta metetdaksü.

Hokolbarnü osangbenertem den jembidanga Lula-i, India aser Brazil nati shishilembatsü

atema US dollar masü saka pei sen ajanga shishilembatsü akok, ta metetdakja liasü.

Yaküm July ita nung Modi-i Brazil semdangba mapang nung linük anati Trade Minister-level review inyakym ka tenzüksü aser 2030 küm tashi nung linük ana tsüngda dollar sen billion 20 jenjang shishilembatsü atema jembishinüa liasü.

Rajasthan final electoral roll nung tassenpur lakh 10 züngok

New Delhi, February 21 (Agencies): Rajasthan nung Election Commission-i Special Intensive Revision (SIR) exercise tembangba sülen final electoral roll sangdongogo; final roll nungi tenüng lakh 2.5 jungnüa züngdokogo aser lakh 10 dak tali züngokogo.

Yaküm October 27 nü draft electoral roll sangdongba sülen final electoral roll nungi tenüng 2,42,760 züngdokogo.

Electoral roll nungi tenüng aika züngdokyonga tang Rajasthan nung registered

Congress-i AI Summit nung longkak aitba anema BJP-i longkak ait

New Delhi, February 21 (Agencies): Hokolbarnü Delhi nung Global AI summit agiba tesem nung Indian Youth Congress (IYC) nung inyakertemi tola semzüker longkak aitba anema Honibarnü yimti aika nung BJP-i longkak aitogo.

Honibarnü Mumbai nung BJP nung inyakertemi longkak aita Congress party lenir Rahul Gandhi dang wako tanak sayua liasü.

Anepdang Rahul Gandhi, Chhatrapati Shivaji Maharaj International Airport nung anenba sülen gari ajanga Bhiwandi-i oa court ka matsüngdangi ao.

2014 küm tenüng menüksüba ken o ka dak sendakba nung pa court matsüngdangi ao.

Mumbai nung dang masü saka Delhi, Jaipur, Jammu aser Surat yimitem nunga BJP nung inyakertemi Congress party anema longkak ait.

Delhi nung BJP Yuva Morcha nung inyaker kati, "Yashi Indian Youth Congress nung inyakertemi maaksütsü mapa inyakogo. Rahul Gandhi



atemabo AI ya anti-India (India anemba) lir. Yashi longkak aitba ajanga alima dang temaitsü tamajung ka sayuogo. Rahul Gandhi aser Congress party-i linük dang tatok meshitsüla," ta ashi.

BJPMP Manoj Tiwari-ia, "Iba tatalokba atema linük nüburtemi Congress dang tai matoktsü. AI summit nung adentsü atema linük 80 nungi lenirtem arua liasü aser India-i meranga inyakba atema tenüngsang agütsüogo," ta metetdaksü.

Yashi longkak aitba dak sendakba nung Indian Youth Congress lenir pezü -Krishna Hari, Kundan Yadav, Ajay Kumar aser Narasimha Yadav nung pua Patiala House Court matsüngdangi anir oa liasü. Court-i parnok aitsüra küm 7 tashi tepuokdak ayutsü akok.

voters ajak senteper 5,15,19,929 jungogo, kechiyong voters tassenpur 10,48,605 bendenloka liasü, ta election commission-i metetdaksü.

Tang electoral roll tassenba nunggi tebur voters 2,69,57,881, tetsür voters 2,45,61,486 aser transgender voters 562 densema lir. Ano lanur voters tassenpur (arrshi küm 18-20 tsüngdapur) 4,35,061 agi teimba kümogo, aser ibaji draft roll den medemdangra shilem 0.82 agi teimba akümba lir.

SIR exercise tanabuba shilem kübok state 9 rongnung Rajasthan densema lir.

Election Commission-i, "Voters final list sangdongyonga voters list nung tenüng züngoksemba mesüra tenüng melenshiba inyakym maneni inyakdar," ta metetdaksü.

Rajasthan nung legislative assembly election 2028 küm November ita nung agitsü. Tang Rajasthan nung chief minister teinyakdakji Bhajan Lal Sharma lir.



Bhubaneswar, February 21, 2026: Honibarnü Odisha Legislative Assembly nung Question Hour mapang BJD aser Congress MLA temi longkak aitagang tangokba noksa nung angur.

ICICI Bank Branch Office: ICICI Bank Ltd, Agartala Jain House North Gate Palace Compound, Agartala, Tripura-799001.

PUBLIC NOTICE - KIOJEN AYOKTSÜ ATEMA TENDER DEN E-AUCTION

[See proviso to rule 8(6)]
Kiojen ayoktsü notice

Securitisation & Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 nung Rule 8 (6) kübok E-Auction ajanga kiojen ayoktsü notice. Public aser talisa sen apur(tem) aser Guarantor(tem) dang ya sangdonger, tsünglanglen shia aliba Secured Creditor dang mortgaged/ charged süa aliba kiojen ya ICICI Bank Limited nung Authorised Officer-i agiadokogo, aser iba kiojen ya 'Kong aliar yamaji', 'Koma lidir yamaji' aser "Yangji aliba ajak" tsünglanglen shia aliba ama ayoktsü;

Sr. No.	Name of Borrower(s)/ Co-Borrowers/ Guarantors/ Loan Account No.	Details of the Secured asset(s) with known encumbrances, if any	Amount Outstanding	Reserve Price Earnest Money Deposit	Date and Time of Property Inspection	Date & Time of E-Auction
(A)	(B)	(C)	(D)	(E)	(F)	(G)
1.	Mr. Anich Mia (Borrower) Aidhan Bibi (Co-Borrower) TBAAA00006503309, LBAAA00006521861	Sabek Dag No. 1397 (Part), Hal Dag No. 1467/ 1803, Khatian No. 517, Revenue Circle Kamalpur, Mouza Mohanpur, Mahakuma Kamalpur, Tahasil Kamalpur, District Dhalai, Tripura. Admeasuring an area of 08 Satak (as per the current valuation, land area stands 3456 Sq. Ft. and construction area stands 1680 Sq. Ft	Rs. 34,11,325/- As on February 05, 2026.	Rs. 22,50,000/- Rs. 2,25,000/-	March 09, 2026 From 01:00 P.M To 04:00 P.M	March 16, 2026 From 10:30 A.M Onwards

Online auction ji onok indang auction agency M/s NexXen Solutions Private Limited The Mortgagors indang website (URL Link-https://disposalhub.com) ajanga ayoktsü. March 13, 2026 nikongdang 5:00 ako matongdanga sentsüh ajak den sen tetemlok agütsütsü atema maongka agütsüba metetdaksür, mesüra secured asset(s) ji metetdakja aliba ama ayoktsü. Tejangrar Bidder(s)-i Earnest Money Deposit (EMD) Demand Draft (DD) (Refer Column E) ji March 13 tashi nung nikongdang 5:00 ako matongdanga ICICI Bank Ltd, Agartala Jain House North Gate Palace Compound, Agartala, Tripura-799001 nem agütsütsüla. Iba sülen pamoki offer ji tekalen agüja aliba website ajanga March 13, 2026 anogo tashi nung nikongdang 05:00 ako tashi nungbosa agütsütsüla, iba denji EMD sen agütsüba kuli ama Bank acknowledged DD scan süa agütsütsüla.

Tejangrar bidder(s)-i pa/la offer ji iba website ajanga magütsüetra sign süa aliba tender documents ji March 13, 2026 nü nikongdang 5:00 ako tashi nungbosa ICICI Bank Ltd, Agartala Jain House North Gate Palace Compound, Agartala, Tripura-799001 nem agütsütsüla. Earnest Money Deposit DD/ PO ji Nationalised/ Scheduled Bank ka nungi 'ICICI Bank Limited' nem "Agartala" nung agütsüba asütsüla. Inspection, E-Auction atema telatetbatem aser tenders agütsüba dak sendakba osang tejangra atema ICICI Bank Employee Phone No. 916334339 ajanga tongtepretepaing.

Iba kiojen ayoktsü atema Marketing agencies ji 1. ValueTrust Capital Services Private Limited, 2. Ginarsoft Pvt Ltd. nem-a lemzüksüogo. Kuli kecha magütsü bids kar magizütsü mesüra ajak magizütsü atema Authorised Officer dak temeden lir. Iba sale dak sendakba telatetbatem tejangra metettsü atema www.icicibank.com/n4p4s nung repringang

Date : February 22, 2026
Place: Kohima

Authorized Officer
ICICI Bank Limited



TIR YIMYIM YIMOBILEM (EDITORIAL)

DIMAPUR

AMUNGNÜ

TSÜKLAI 22, 2026

Arogo insem

Tang ya arogo ajak nung Sunday school tenzüka aoba mapang ka lir. Taoba deobarnep tashi nung arogo aika nung iba class ya tenzüko, ano yamaji tanepa arogo aika nung Sunday school ta tenzükdar. Ibai küm piyong tanurtem dang sayua aotsü asoshi apusoba mapang ka lir. Arogo nung Sunday school ya kanga dang tongtibang shilem ka. Arogo insemji ibai. Shin o ka nung yamai ashi: 'Sunday schoolji arogo hon atudak'. Arogo tashi it-a aser tamanger ajak Tsüngrem o nung tera yangdakja Khrista metetba nung jaklaliro teintet küma, Yisu indang kulisüba mapa ajak nung abensaa inyaksü atema renemdakji Sunday School ya lir. Alima tsütsü school nung shisaliok koda angazüker aji oda tila tanurtem Tsüngrem o tsütsü kimong yangera angazükdak tesembaji Sunday school ya lir. Tanü asenok taintem ya tenüng agibo Khristan tajung ta jembir saka tamang nung tera meyangteti aliba ya kechi tai ajanga? ta bushia ludangra, ashiko kuli kaji mapang shitak nung Sunday schooli oa pei tangazüksü tim mangazükba ajanga asütsüa akok. Tanü asenok khristan kibong timbaka nung tanurtem dang Tsüngrem o sayuba ya kanga ajema lir, ibaji kidang kibok tekülem metsünga reta magiba ajanga lir. Arogo kari Sunday school ya pei dak aketba wadang ta jangjaa mangatet, iba jagi SS atema khuret makai yutsür. Aji saka Sunday school ya arogo nung kanga dang tongtibang tenük telen ka lir ta metettsüla. Sunday school ya tashi ita aser tajungba küma meyanglushi tashi, asen jala jabasotemji Tsüngrem o nung tera yanga maintsü. Aji saka koba arogo nungsa sannüker aser toklang tenzükertemi yangi temulung agütsüdir iba arogo nungji temelenshi tulu adoktsü. Kechiaser arogo nung süngjangjibo Sunday school ya ajang dang atangtsü. Merang yin mi nung merema tsüker alidang insem nungji akora kiburi aginüba ama oset shitakbaji tobur junga yanglutettsü. Yamaji tila tanur asüdag Sunday school nung khrista jakla shitakbaji angazükdaktsüra, asüng yanü parnok tain akümdang parnoki tekülem sentep kata mezüi longsoa arutsü, angateta lir asünungji arogo nem tenla-a shitak agütsütsü, arogo maparen balala ajak nung temulung agüja shilem agitsü. Iba den ano parnok taküm shiaji achia ajemba aser libaliro nung tazüokba nisungtem dang asütsü. Süra yamala agi sünga aliba arogo aser lokti nungjagi temelenshi shitakbaji madoklima? Yamala lokti ka yanglutettsüba tani arogo mapatong dak tuluka sendaka lir ta angatetdi. Sunday school jungdaktsütsü atema arogo ajaki parnok nem budget balaka lezmüktsütsüla, mapang shitak nung Sunday school tesayurtem shimtsütsüla. Nüngdakra ano Sunday school tesayur nemjia arogoi teyari sen terarabo agütsütsüla. Sunday school tesayurji tenüng atemabo shima meyutsütsüla. Khuret akaba aser tamang nung teintet rogotemi sayura kechiba tanurtemji majungtsü? Iba denji ano tesayurtemjia tanela nung ajungmesoa jangradaktsütsü asoshi, küm nung arogo sannükeri anir Sunday school tesayurtem denji akok tashi telungjem mapang aiben agitsüla. Iba dakji alaka ano, küm shia amato arogo nung Sunday school tesayurtem rongnung nisung karbosa melentsüsa mapangi bener arutsür, anungji arogoi ketdang Sunday school tesayurtem nemji mapang shitak nung training tajung agütsütsüla. Nok tajung amba nisungi mapa majitba otsü kar ali asü?... Aji süra parnoki küm piyong tanurtem dang kanga junga sayutettsü. Arogo nung Sunday school department lapoka yutsüba, küm tatem nung ken tatitang agia tanurtem nem certificate agütsütsü asoshi dang ta arogoi mebilemstüla, saka ibai tanur shia taküm piyong asoshi tanela nung kimong yangerdak insem ta mamadoktsüla. Item ajaki meteta arogoi Sunday school nung temulung kanga agütsütsüla. Koba arogoi aji oda inyaker, temelenshi tajungji iba arogo nungjagi adoktsü.

OLEMSABANG

ABAM Sanen Luden dangi odi (open) shiti (An Open letter to ABAM Sanen Luden)

Subject:- 129 Buba ABAM Küm Tatem Mungdang nung Reverend ana Ordination meyipba agitsü lemtetba nung tebilemdangtsü olen kar.

Teti akümtsüba aliba ABAM Sanen Luden, President aser Executive Secretary-i anir Yisu temeim agi alangzükba Khrista Ochi pukhümer züngsem tajungtem. Tamasa Molungyimsen Laishir Telongjem Media Cell ajanga Küm Tasen aser talubosa aliba Yisu Temeim salem abener. ABAM-i Arogotem nungi aruba shiti dak alaka kija aser lokti kechaia züluba shiti magizüker asünung iba odi (open) shiti agi nenok ket junga tongtetsü sarasadema zülur. Taoba küm ABAM Küm Tatem Mungdang Yimpoksüi (Nov.) 13 & 14, 2025 Impur nung amongdang Molungyimsen Baptist Arogo anema lemtet agidang Reverend ana dak kongshiba onük nung tebilemdangtsü olen khar nenok shisa talang agi rajemshitsü yamai lemsateper.

1. ABAM Ordination guideline no.7. Ordination Agienba/Meyipba agiba (d) **“Kibong nung kinungbu mesüra kinungtsü nungi tenüng menük bener arura, tatishitsü agi: Nüktabangta, auyaba, senchimenji, kilamet, kija asoshi court case, kibong balaluyuba aser kuli tejangja makai pilaa aliba (separate) kuli ngura ordination meyipba agientsü (sic)”** (Ao Baptist Arogo inyakyim leniba, 2022, p39). Iba inyakyim ocet nung amendaker Sanen Ludeni iba lemtet bener arua Mungdang nung agizükdaktsü.

ABAM lemtet yamai aru: (ABAM letter No: AB03A32/2025-26/106.

Dt. Impur the Nov. 15, 2025)

Sl.no. d. (1) “Ao Baptist Arogo: Inyakyim Leniba tang tamshidak (2022 Edition) tapak 39 No. 7. Nung Ordination Agienba/Meyipba Agiba indang shia lir. Iba ordination agienba nung “...court case...” dena lir. Anungji, Molungyimsen Baptist Arogo-i ABAM anema Okadak ken-o agütsüba nung kulipur süa aliba nungi Rev. S. Tajung aser Rev. C. Walu Walling, tenati ita asem tsüngda nung agienadoktsü taochi sayur. Ita asem tsüngda parnoki kulipur süa aliba nungi tenüng agiena iba osang ABAM nem magütsüra Ordination inyakyimi mela-a aliba ama tena nungi Ordination agientsü” (sic).

2. Reverend ana court-i aoba kuli:-

ABAM Lemtet 1986 resolution no. 40 nung amendaker Molungyimsen Arogo 150 jubilee amongdang, ABAM Sanen Ludeni Executive Secretary sentong nung Tsüngrem O jembitsü meyok (i.e Molungyimsen Arogo Jubileemomg songtem {boycotted}). Anungji, iba anema court case agütsü. Joko court nung keno benoka jembia aodang Mungdang aser Arogo tenüng nung inyakba maparen kar jangjatsü nüngdaka akümnung, court-i tenzüker (reverend) ka jaok (summoned), aser kabo pei Arogo dangi Mungdang nungi shiti arubatem indang kuli agütsütsüsa aküm. Ya tena pei kija asoshi temeden bushii aoba masü saka court nung item kulitem agütsüi aotsüsa kümadok. Anungji, ochishir Tsüngrem lar kaka ama tasü ita court nung oa ochi kuli agütsüba dang (tena courti jaokba/aoba kuli tejangja nüngdakra lir). Ya tena “kija asoshi court case” bener aoba masü ta angateter. Anungji, iba mechi ordination meyipba agitsü tiim asü?

ABAM Sanen Ludeni iba ordination inyakyim ya shitak ochishia amshi tenzükdiki asünungbo lepa bilemdangtsü mapa kar lir masüno? Tesüiba mapangtem nung, aser tawa tanü atalokba tensa kar nung tenzükertem (reverendtem) karbo Ordination inyakyim No. 7 (d) nung aibelenbatema lir masüno? Süra parnok atemabo iba inyakyim ya tasü (inactive) kümdaktsü asü? Iba inyakyim ocet ya Molungyimsen Arogo asoshi dang taküm aser tangar atemabo tasü ta ayutsü asü? Khen junga shisadangdaktsüner.

Tatem nung ya dang shiner, **Reverend** ta asüba maongka ya alima nungbo Tsüngrem den atongdakba tenzükertem nem semoktsüba sobutsü ka ama lir. Anungji, iba temeshi sobutsü sepzüka ayutsü ya kanga dang Temeshi (heavenly) Tashi (authority) ka ajanga dang inyaktettsü ama bilemer. Süra tashi maitba/aibelener ordained minister ka dak nungi iba temeshi sobutsü agizuktsüji, Yisui Farisitem dang ashiba ama **“nenok rongnung shiba dak temenen mali pai tamasa la dak lung agi ondakang” (Yohan 8:7)** ta ashidang Sanen Luden nung reverendtem rongnungi shiba temeshiba teka tama aitsü (Executive Secretary asü Church and Mission Secretary asü ABAM President asü mesüra Reverend shiba asütsü???) Yabo Tsüngrem den azüng-ashiba mapa, pei taküm an-tokdangba mapa ka ama asütsü. Iba ya Aor reverendtem atema Tsüngremer temoatsü aser atak-atem tsüngda arla ladangba anogo asütsü. Asenbo merükteta mali sürnung tangar dak teka yira, iba sülen asen dak Tsüngrem teka yira koda tesasatsü. Anungji, Tsüngrem tsüba kanga sarasadema inyakangni ta ajungshir. Iba tashiyim mapaya Tsüngremi molungba süra ABAM Tsüngremi tali moajang, aji masünungbo shiba aibelener ibaibo pei khuret asütsü ashii Aor Reverendtem ajakdakbo tekaodaktsüni ta sarasademtsür.

Media Cell,

Molungyimsen Laishir Telongjem.

Date: 14/02/2026

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

AP Christian Leaders Forum-i Vande Mataram tekong 6 anemer



February 17, 2026 nü Vijaywada nung Andhra Pradesh Christian Leaders Forum (APCLF) nung lenirtemi osangbenertem den jembidang tangokba noksa nung angur.

February 21, 2026: Tawa Central sorkari official sentongtem nung aser school tem nung linük ken 'Vande Mataram' nung aliba tekong trokprongla atentsü tuyuba anema Khristan aser Muslim organisation aikati ola adoker.

Khristan aser Muslim teloktemi, sorkari iba tetuyuba ya magienra Supreme Court matsüngdang ken o benoktsü, ta metetdaksüo.

February 17, 2026 nü Vijaywada nung osangbenertem senden ka ayongzüka jembidang Andhra Pradesh Christian Leaders Forum (APCLF)-i, Vande Mataram ken nung aliba tekong ajak atentsü atema tetuyuba agütsüba ya tangsa agienadoktsüla, ta metetdaksü.

AP Christian Leaders Forum nung Chairman, Oliver Rayi-i, "Vande Mataram ken atenba atema Khristantemi kodanga ashishia maru, ajisüaka tang tekong pezü talila atentsü tuyuogo, aser item tekong nung Hindu nunger Durga tsüngrem tenüngsanga lir, aser iba ya Khristan tamangba yimsü anema lir," ta metetdaksü.

Osangbenertem senden nungji APCLF Secretary Rev Pastor Arul Arusu, APCLF State Churches Coordinator

Rev Jyothi Anand, Greater Vijayawada Pastors' Fellowship Tir Rev S Jayakumar Babu, FFI National Tir Peter Putta, APCLF Krishna district coordinator Rev B Raviprakash (Baptist Church) aser APCLF State Coordinator Sunny James nungera liasü.

Oliver-i, "India ya secular linük ka lir. Iba linük nung sobaliba, kin aser yimsü balala amangertem külemi alir. Shisaliok rejutem nung yimsü ka indang keta aliba kangshia benokba ya tagizüktetsüla masü," ta ashi.

Paisa, India nung Ato kilonser mezüng inyaksang Jawaharlal Nehru aser Nobel prize angur Rabindranath Tagore ama lenirtemia iba ken nung mezüngbuba tekong anaji dang atentsüla ta jembia liasü, ta metetdaksü.

February 12 nü All India Muslim Personal Law Board otongdar, S.Q.R. Ilyas-ia, "Iba tetuyuba ya linük temzüng aser yimsü temeden anema lir. Iba ken nung Durga tsüngrem densema tanga tsüngrem balala külemba indang lir. Ibaji Muslim nunger yimsü den meputep," ta metetdaksü.

Jamiat Ulama-i-Hind Tir, Arshad Madani-ia, "Iba ya yimsü temeden anema inyakba

lir. Iba ken nung keta aliba tekong kar nung iba linük ya tsüngrem ka ama züngshir. Iba ken atentsü atema Muslim nunger ka rongshibaji linük temzüng kübok Arrla 25 anema lir," ta metetdaksü.

January 27 nü Union Ministry of Home Affairs-i states aser union territories nung chief secretaries dang Vande Mataram ken nung tekong trokpronglaji minute 3 ser second 10 atentsüla, ta tetuyuba agüja liasü.

Vande Mataram ken küm 150 ajungba benjungmong küm ka piyong amongtsü aser iba benjungmong ya yaküm November 7 nü Ato kilonser Narendra Modi-i tenzükja liasü.

BJP-i, 1937 küm Congress-i iba ken nung tongtibang tekong aika agiena liasü, aser ibaji ajanga linük ana (India aser Pakistan) küma lemsatsüsa metsüh proka yutsü, ta aitsür.

1937 küm Congress Working Committee-i Vande Mataram ken nung mezüngbuba tekong anaji dang atentsüla ta telemtetba agia liasü.

Iba ken nung tanüngba tekongtem nungbo Hindu nunger tsüngremtem- Durga, Lakshmi aser Saraswati nunger tetshia lir.

Burma nung civilian amakba World Council of Churches-i aitsür

February 21, 2026: Tan ita tetenzüklen Myanmar nung bomb amshia Mennonite yim amakba sülen tan hopta World Council of Churches (WCC)-i Burmese army temi civilian maneni amakba atema aitsüo.

Myanmar Peace Monitor indang report nung ajemdaker World Council of Churches-i, tesüiba ita 15 tsüngda sepaitemi civilian aliba tesem 1,000 dak tali maakogo, ta metetdaksü.

Assistance Association for Political Prisoners-ia, 2021 küm Burma nung sepaitemi sorkar atsüngdokba sülen sepaitem yimsüsüba kübok nisung 7,807 tepsetogo, ta metetdaksü.

WCC general secretary Rev. Prof. Dr. Jerry Pillay-i, "Nüburtem amakba ya international ozüng anema lir, meimchir temeden aser taküm akhümket anema lir. Onoki Mennonite Arogo den tejashi lemsateper aser Myanmar nung timtemba nüburtem dena tejashi lemsateper," ta metetdaksü.

Yaküm March ita nung U.S. Commission on International Religious Freedom (USCIRF)-i report ka ajanga Myanmar nung Tatmadaw sepaitemi Khristantem densema minorities anema asalentong yanglur inyakba metetdaksü alima linüktem dang Myanmar nung reshikangshi ajangshiba

nüburtem atema ola adoktsü mepishia liasü.

"Tesüiba küm ishika tsüngda iba linük nung nisung million 3.5 dak tali jenshiogo. Khristan nütsüng teimba aliba Chin State nunga nisung 90,000 tali jenshiogo, Kachin state nung nisung 237,200 aser Rohingya refugees million 1 jenshiogo," ta USCIRF-i metetdaksü.

Karen lisopurtem shilem 20 nungi 30 bo Khristantem lir aser Chin nungbo nütsüng shilem 90 dak tali Khristantem lir.

Buddhist nütsüng teimba aliba linük nung ya akhidang nungi Muslim Rohingya aser Chin Khristantem anema inyaker.

ANO GO ABEN TSÜNGREM DEN

Taidok Angutsü, Taidok Agüjang

"Aser ozüi kechi koda pei tai doka lir, aji oda ozü tai tokangma"- Matt. 6:12.

Tagizükba dang nungi tagütsüba sentiba lir. Asenok menen khuret bena arur, shiba dang asenoki mejungi inyak, pai asenok nem taidok agüja nüji kümdaktsü. Ibai koda tesüngmangtsü! Yisui nütsüngtem dang Tsüngrem dang sarasademba shia taidok meshia sarasademtsü sayu. Asenoki anogo shia Tsüngrem dang anogo shia tai menar ta Yisui metetta liasü, kechiaser asenoki Tsüngrem sentsüwangshi metongtetter. Tsüngrem dang tatok memeshi asenoki anogo kata süidaktsütsü makok.

Asenoki tangar dang tai atokba ama asenok dang tai tokang ta Tsüngrem dang sarasademang, kechiaser asenoki tai atokba ama kasa lenmang nung Tsüngremi asenok dang adoktsü ta Yisui nütsüngtem dang sayu (Matt. 6:15). Tsüngrem yimyaji taidok agütsüba lir (Anitet 34:6-7). Asenok Pa nütsüng süra, Pa tsüngsü nung jajatsüla. Tsüngremi taochi makaba tsükchir dang atoktsü süra, asenok tajemba inyaktsü kecha mali. Tamajung karbo tai matoktsüla ta Yisui mesayu. Tai matoktsüla ta Laishiba nung tesayuba agüja mali.

Nai kar nem taidok agütsütsü sottadokra, ne teküdem aser sarasadem amajok (Matt. 5:23-24). Ne mulungjang nung memelungi iba nungi kümdanga alitsü Tsüngrem dang asüngdangang. Ne nungdak tatok nendaka mita aliba ajanga tangar majungji tesangwa dangi arudaktsütsü. Na Khrista ama alitsü Tsüngrem dang asüngdangang; süra na rishikangshi danga nai sarasademtettsü, "obala, parnok dang tai dokang."

Muslim nunger kati jabasoi Khristan yimsü agizükba agi tepset

Nairobi (Kenya), February

21 (Agencies): Uganda nung Muslim nunger kati par jabasoi Khristan yimsü agizükba agi tepset.

Butaleja district nung arrshi küm 62 Hamba Ahammada-i par jabaso Hamba Juma (33) lepset, ta Juma kinüngtsü, Nangobi Mariati-i metetdaksü.

Hamba Juma-i kinüngtsü den tanur pezü toktsür pilaogo.

Mariati-i, "Kü kinüngbu küna mo atemtsü atema alui ao, aser kidangi shilangba mapang nung ozü kidang küko liasü," ta metetdaksü.

"Onoki ajak chiyungtsü atema renem. Onok chiyungba sülen kükoi ozü jabaso dang nok meshia liasü. Tatsüka lir pai kü kinüngbu aja, iba sülen pai kü kinüngbu lepset," ta lai metetdaksü.

"Nisung ka motorcycle nung aruba sülen küko anir nungertem lir, ajisüaka anüdoklen Muslim nütsüng teimba aliba tesemtem nung mapang shia Khristantem hospital-i anir ao saka

mekümzüktet," ta lai ashi.

Mariati-i, "Onoki Islam yimsü toktsür Khristan yimsü agizükba agi kü kinüngbu lepset. Küko densema kinüngertemi onok

mezüngmeshia aruogo aser onoki Islam yimsü toktsüba ajanga onok ajak tepsettsü amokmerena liasü," ta lai osangbenertem nem metetdaksü.

Uganda nung mapang shia Khristantem amaker, talisa Islam yimsü toktsür Khristan yimsü agizükertembo kinüngertem mesüra kibong züngsemtemia tepseter.

Uganda linük temzüng ajanga yimsü temeden agütsüba dang masü saka tangar den pei yimsü lemsateptsü aser tanga yimsü dangi meyiptsü temeden agüja lir.

Uganda nung nütsüng shilem 12 dang Muslim nungertem lir, ajisüaka anüdoklen Muslim nütsüng teimba aliba tesemtem nung mapang shia Khristantem anema inyaker.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Tzüshi

- (n) Tzünglu tulu arua ayong nung janaona ponger aoba (flood carrying away rubbish and muddy water)
- * Tzünglu tulu arua tzüshi agi janaona ajak ponger oadokogo.

Tzüshikhu

- (n) tzüshi enoka abenba khu (rucksack type traditional basket to carry water in bamboo containers)
- * Tzüshikhu nung tzüshi dang masü saka sünga dena abener.

OLONG PAITEP # 7422

	1			2						3
4			5							
					6					
7								8		
9								10	11	
12										
								13		
14										

TIPIEN

- 2. Tambur makümba mapang - (7)
- 4. Aon mali - (4)
- 6. Tetsüng tsünglanglen - (6)
- 7. Reprangdaktsü - (4)
- 8. Shiruru apuba - (4)
- 9. Ya - (4)
- 10. Yangkhu - (4)
- 12. Kisüng / Tesa - (6)
- 13. Lenmang aika nungi - (4)
- 14. Aou nung chiyongtsü asenba - (7)

LANGTSÜNGLEN

- 1. Ashiba meinyak - (5)
- 3. Teberem nung benlok - (5)
- 5. Tenük agi penzü - (4)
- 6. Tekolok tajung - (7)
- 7. Nguyutep - (7)
- 10. Kimeketbangba - (4)
- 11. Lemdang - (5)

OLONG PAITEP # 7421 TELANGZÜBA

TIPIEN :

- 4. Semki, 6. Ayok, 7. Labi, 9. Tasa, 11. Anameta, 14. Anem, 16. Bala, 18. Waro, 19. Aginü.

LANGTSÜNGLEN :

- 1. Putet, 2. Mangsa, 3. Aon, 5. Kibok, 7. Lemta, 8. Tamen, 10. Anüla, 12. Anüdok, 13. Ojang, 15. Mangi, 17. Man.

NAI-A YA METETTER MA



Institute of Tourism Studies (Malta) nungi Andrew Farrugia aser Consorzi di Pesticherie Bergamo-Brescia (Italy) ajanga "longest chocolate sculpture" yanglutetogo ta Guinness World Records-i kuli agütsüogo. January 26, 2026 nü Milan, Italy nung record-breaking sculpture sayaa liasü aser iba ya chocolate agi dang train tejen ka mesüka yangluba lir. Iba sculpture nung engine ka aser carriages 22 keta aser carriage shia indang touzükji seret 160 lir.

PM Modi-i Guwahati-Silchar expressway tenzüksütsü



Guwahati, February 21, 2026 (Agencies): Prime Minister Narendra Modi-i March 14 nü Barak Valley nung Rs 22,000-crore expressway tenzüksütsü. Iba ajanga Guwahati aser Silchar sendakteper aser ghonda 8 senzüba nungi ghonda

clearance nguogo aser land acquisition tiptema inyakdar ta CM Sarma-i ashi.

"Iba mapatong atema ali maparen shitak dang inyaka arudar aser kobi melii lenmangtem yanglutsü" ta pai ashi.

PM Modi-i Silchar flyover lapoktsütsü aser iba ajanga urban mobility tajungba akümtsü ta Sarma-isa shisem.

"Silchar nung greenfield airport atema environmental clearance nguogo. Iba atema state cabinet nungi temelaba nungdaktsü aser onoki March nung maparen tenzüksü merangtsü. Yamaji mesüetra assembly elections sülen tenzüksü" ta paisa ashi.

Arunachal Governor-i State Awards & CM's Award agütsü

Itanagar, February 21, 2026 (Agencies): Arunachal Pradesh Governor K. T. Parnaik-i kija aser teloktem nem State Gold aser Silver Medals lema agütsüogo.

Parnoki district balala nung governance, welfare aser public service nung shilem tajung agiba ajiteta agütsü.

Maneni, sorkar departments aser agencies balala nem Chief Minister's Award for Excellence in Public Administration for 2025 agütsü. West Siang district nung Urban Development Department nem Aalo Town Beautification, Nirmal Aalo Movement aser Swachh Bharat Mission (Urban) 2.0 atema sempet agütsü.

Lok Bhavan nung sentong ka nung paisa Chief Minister's Award for Excellence in Public Administration agütsü. State Gold Medal ya 2nd Battalion, Arunachal Scouts nungi Havildar & Honorary Naib Subedar Lekhi Passang (Retd), Arunachal Pradesh Public Service Commission nung tim masüba jungkai adokba asür Gyamar Padang aser Women Police Station, Pasighat nem agütsü.

Arunachal Pradesh Public Service Commission nem institutional reforms atema aser District Urban Development Agency, Namsai nem septage management project atema sempettem agütsü.

Maneni, ketdangsürtem, social workers aser teloktem nem State Silver Medal agütsü.

Maneni Longding Deputy Commissioner office nem Kanubari nung multi-purpose sports hub aser recreational park ka yangluba atema sempet agütsü.

District Administration aser Women & Child Development Department, West Kameng nem Bomdila nung technology-enabled anganwadi centre amenokba atema sempet agütsü.

Chief Minister Pema Khandu-ia Urban Development Department, Aalo nem tenüngsang agütsü. "Tesüiba nunga Federation of Indian Chambers of Commerce and Industry (FICCI) ajanga Urban Challenge Summit and Awards ceremony nung parnok nem sempet agütsüogo" ta CM Khandu-i ashi.

Arunachal nung security forces-i NSCN züngsem ka apu



Dibrugarh, February 21, 2026 (Agencies): Arunachal Pradesh kübok Longding district nung security forces-i NSCN züngsem ka puogo.

Iba mapang Longsom nung asür Ajong Wangpan'er jabaso NSCN-IM züngsem Capt Ponglem Wangpan (35) apu.

pur aotsü mesüra tepsettsü atema aruba liasü. Ajisüaka joint security forces-i mapang shitak nung inyakba ajanga kiralongraba tasa ka noktangtetogo" ta ketdangsürtemi ashi.

Assam Rifles, Special Task Force aser Longding Police külem telok kati mita aodang Capt Ponglem Wangpan apu.

Pa ket nung 5.56 mm INSAS rifle ka, 9mm pistol ka, INSAS magazine ka, pistol magazine ka, 18 rounds 5.56 mm ammunition, aser 9mm rounds ana ngutetogo.

Iba dak sendakba nung Longding Police Station nung Unlawful Activities (Prevention) Act (UAP(A)) kübok FIR ka benokogo aser maneni bushisüngdang südar.

Zedua village anasa Tissing nung parnoki NSCN züngsem apu ta osang angazüker.

"Ponglem Wangpan-i züngsem pezü anir liasü. Parnok ya Longding nung nisung

Cuba nung security force tem Venezuela toktsür odar



Venezuela interim President, Delcy Rodriguez aser Cuban Foreign Minister, Bruno Rodriguez Padilla nati rara nung asür sepaitem nem aküm tetushi agütsüba mapang.

Caracas, Tsüklai/February 21 (Agencies): Interim tir Delcy Rodriguez-i aniba sorkar Washington-i kanga nongshiba mapang Cuba nung security adviser aser doctor temi Venezuela toktsür odar, ta source 11-i metedaktsü.

Venezuela Interim tir Delcy Rodriguez-i la anütsü asoshi Venezuela nung bodyguard tem nem nongloksüogo, ta source pezüi ashi. Taoba tir Nicolas Maduro aser pa masüdag asür tir Hugo Chavez natibo Cuba nung sepaitem dak metaloker liasü.

U.S. military-i January 13 nü Maduro aputsü atema amakba mapang Cuba nung 32 tepset, ta Cuba sorkari metedaktsü. Item sepaitem ya Caracas aser Havana na tsünga security dak sendakba nung tenangzüktepba yangluba nung shilem ka liasü.

Tenangzüktepba ajanga Cuba nung itangitertem military aser Venezuela indang DGCIM counterintelligence unit nung shilem agütsü temelaba agütsü.

Chavista sorkar atema Cuba teyari kanga nungdaka liasü, ta New York University nung history associate professor aser Venezuela ken o nung mongin Alejandro Velasco-i ashi.

DGCIM telung nung Cuba nung adviser tem kar parnok mapa nungi aginogo, ta taoba Venezuela intelligence ketdangsur kati ashi. Cuba nung medical worker aser security adviser tem tawa Venezuela nungi Cuba-iogo, ta source anati ashi.

Venezuela indang ruling party den sendaktepa aliba source kati ashiba agi, U.S-i nongshiba sülen Rodriguez tetuyuba nung Cuba nungertem

Venezuela toktsür odar. Tanga source temi ashiba agi, lenir tasentemi mintokba agi asü, parnok mulungka nung asü, Havana-i parnok kidangi meyipa arutsü tetuyuba agütsü aji mejangja.

Tir anükertem aser counterintelligence unit nungi Cuba nung agütsü atema telemtetba agiba ya taoba mapangbo metedakja maliasü.

Maduro agütsü atema jenjang magi tsünga Cuba nung doctor, nurse aser asaya balala indang coach tem Chavez kübok welfare program nung shilem ka ama Venezuela nung inyaka liasü. Iba melena Venezuela-i Cuba nem totzü agüja liasü.

U.S-i amakba sülen tir Donald Trump-i Venezuela aser Cuba na tsünga security tesendaktep tembangdaksütsü ta tenangzükba agüja liasü.

Trump-i taruba ita anogo asem atema China semdangtsü



Washington, Tsüklai/February 21 (Agencies): Donald Trump-i March 31 nungi April 2 nü tashi China semdangtsü, ta White House-i metedaktsüogo. Trump-i 2017 küm Beijing semdangba sülen tang mezüngbuba United States tir kati China officially semdangtsü lir.

Trump aser China tir Xi Jinping nati ita ishika tsünga linük ana tsünga tesendaktep kanga junga kümer aliba indang jembiba mapang tang Trump-i China semdangtsüba anogo

jangjashitsüogo. Trump-i pa indang policy tem pusemdaktsütsü atema linük balala nem tariff benoktsüer aliba US Supreme Court-i Hokolbarnü magizükba sülen mapang tatsüka lir pai China semdangtsüba indang osang metedakja liasü.

Beijing semdangba mapang tariffs dak sendakba nung tongtibangsa sensak asemtsü imlar.

Beijing-i tawa anüolen aliba linüktem nungi lenirtem aika agizüka arudar, kong Canada

Ato Kilonser Mark Carney-i Beijing semdangba densema lir. Carney-i China den shishilembaba tsütsü tenangzüktepba tasen yanglu aser China nung yangluba electric garitem malitsü atema Canada-i tenokdangba agütsür aliba aginja liasü.

Beijing-i kümtem tsünga technology tasen aser renewable energy nung sen aika entoka inyakba mapang China-i alima dangi electric garitem export asüba tali küma odar.

Kasa mapang nung Washington-ia Taiwan dang prangbong injang aser hadir balala yokdar, koba Beijing-i parnok meyong ta shia arudar.

COVID-19 wara poktetba sülen tang mezüngbuba Trump-i China semdangtsü lir, koba pai "Chinese virus" ta ja liasü. Iba tashidak yagi US nung nisung million ka dak tema asü.

Wara pokteter aliba mapang linük arrtsü ajunga shibanga ayuba 2023 küm January ita lapoktsüba sülen China-i linük balala den tali tajungba sendaktepsü atema meranga arudar.

Nigeria nung ozüng alema inyaksangshirtemi nisung 50 tepset

Abuja, Tsüklai/February 21 (Agencies): Nigeria kübok Zamfara State nung ozüng alema inyaksangshirtemi nisung 50 tepset aser iba den tetsür aser tanurtem pur oa liasü, ta ketdangsurtem aser iba tesem nung alirtemi ashi.

Item nisungtem yagi Zamfara nung Bukkuyum kübok Tungan Dutse yimtsüng Brestibar aonung nungi amaka tenzük aser Hokolbar anepdang tashi maka liasü. Ozüng alema inyaksangshirtem ya motorcylce tem nung mener arua kitem rongtoktsüba den yimdaklirtem pudena liasü.

"Parnok yagi yimtsüng ka nungi yimtsüng ka maka aoer aser iba mapang nisung 50 tepsetogo," ta Bukkuyum South nungi ozüng yanglur Hamisu A Faru-i ashi.

Faru-i Hokolbarnü phone ajanga Reuters news agency dang ashiba agi, nisung kwi pua bener ao aji tang tashi mejangja lir, kechiyong local ketdangsurtemi pur aoertem indang tenüng tangang bendendar. Yimtsüng nung alirtemi parnok amaksüba jelia jangjar liasü ta ashi.

Abdullahi Sani-i ashiba agi, anogo ka tejakang parnoki motorcycle 150 dak tema nung hadir teper bener nisungtem senzusenpongba anguba sülen parnoki security force tem nem

osang agütsü saka kecha jenjang magi.

"Yashi onok shinga memejang; onok ajak mangyim jashi tia nung lir," ta Sani-i ashi. Iba yimtsüng amakba mapang par kinunger asem tepseta liasü.

Nigeria anütoktip aser anüolen ozüng alema inyaksangshiba teloktem aser telungprutemi kanga timten agüja arudar.

Toba hopt-ang northwest Niger State kübok Borgu tesem nung nisung 46 tepsetea liasü. Konkoso yimtsüng nung lendong tulutiba atalok kong nisung 38 tepseta liasü.

Nigeria-i tawa United States den security dak sendakba nung tesendaktep akangshiogo. US tir Trump-i Khrista dak amangertem kümzüka meyutetba atema Nigeria aitsüba den parnok anema military jenjang agütsü ta amokmerenba sülen linük ana tsünga tesendaktep yanglushia liasü.

December 25 nü US-i Nigeria nung ketdangsurtem den sendaktepa anüng ajanga Sokoto state maka liasü.

Iba hopta tetenzüklen Nigeria military-i local sepaitem nem training agütsütsü atema US nung sepai 100 aruba osang jangjashitsüogo.

Israeli-i Lebanon amak; nisung 10 tepsetogo

Beirut, Tsüklai/February 21 (Agencies): Israel-i anüng ajanga Lebanon anütoklen tesem kar amakba sülen nisung 10 tepsetogo, ta Lebanon nung ketdangsurtemi metedaktsü.

Israel military-i ashiba agi, parnoki Bekaa Valley nung Hezbollah pur tamendakdak maka liasü. Hezbollah ya Iran-i teyari agütsüba military aser political telok ka lir.

Hezbollah puri field commander tejen ka densema parnok züngsem trok tepsetba osang jangjashitsüogo.

Ceasefire benokba sülen Israel-i Lebanon nung tesem balala amakba rongnung iba ya-a tesashitiba ka liasü. Israel aser Shia Muslim telok Hezbollah nati 2024 küm November ita rara anendaktsütsü atema ceasefire ka benoktsü atema tenanzüktepba yanglua liasü.

Israel aser Lebanon na tsünga tenangzüktepba nung aibelenba sülen parnoki iba tesem makogo.

Ceasefire koba ajanga ita 13 raraba anendakja liasü, iba sülen Israel-i anogoshia amai Lebanon maka arudar.

Ceasefire koba US aser

France na teyongtsüi ia yanglua liasü, iba kübok mezüngbuba shilem nung Israel aser Hezbollah pur sepaitem ajak southern Lebanon nungi atsüngintsü mulungtepa liasü.

Online nung lemsatepba noksa ajanga Hokolbar aonung amakba tesem ya nüburtem aliba tesem ka ama reprangtetogo.

Israel military-i sangdong aka ajanga, parnoki "Hezbollah command centre tem" amak aser Hezbollah puri parnok centre tem ya nüburtem aliba tesem nung amendaker ta ashi.

Hezbollah ya UK aser US na densema linük aikati kiralongrar telok ka ama agizüka lir. Parnoki ashiba agi, ceasefire atema nangzüktepba ya southern Lebanon nung Litani ayong aser Blue Line na tsünga dang lir.

Iba tesem nung Lebanon army-i Hezbollah puri amshiba infrastructure tem raksatsüogo, koba Hezbollah pur disarm sütsütsü atema sentong aliba nung shilem ka lir.

Ajisüaka iba telok yagi Bekaa Valley densema linük kübok tanga tesemtem nung disarm asütsü memulunger.

Impur Ground dang Dr. T. Ao Ground ta ajatsü



Impur nung Dr.T.Ao Ground ajaba nungtem nung azüngba lung Nagaland Football Association Tir Wb.K.Neibou Sekhose-i jembidang semzüksü kelen NFA,MDFA aser ABAM lenirtem külemi tangokba noksa.

Impur, Tsüklai/February 21(TYO) : Impur lima nung akaba asayadak tenüng Dr.T.Ao Ground ta melena ajaba ajanga otsü tasen ka yanglur ta tanü Impur nung akaba asayadak kong Dr.T.Ao lanuwa football tetsünpak tesa agi asaya iba ground Dr.T.Ao Ground ta ajaba nungtem sentong nung Nagaland Football Association Tir Wb.K.Neibou Sekhose-i jembidang ashi.

AsürDr.T.Ao shibai 1948 küm India nunger mezüngbuba Olympic Football captain sür London-i anir ao pa nungtem nung Impur ground dang Dr.T.Ao Ground ta ajatsüasoshi Ao Baptist Arogo Mungdang-i inyakba asoshi NFA Tir-isa ABAM nem tenüngsang agüja ashi.

Nagaland nung joko Dr.T.Ao academy aser Dr.T.Ao Award tenzükogo iba den külemi state nung, North East nung aser National Level nung Dr.T.Ao nungtem nung Tournament asayadagi. 2004 küm nungi Inter district tournament Dr.T.Ao

Tournement ta melena asayar. 2009 küm nungi North East Gold Cup dang Dr.T.Ao Tournament ta melener asayar ano India nüchiso ngur küm 76 buba nung All India Football Federation ajanga 2024 küm September 10 nüDr.T.Ao nem tetushi agüja Junior Girls National Football Championship tenüng Dr.T.Ao Junior Girls National Football Championship ta melener asayadagi ta NFA Tir-isa metedaktsü.

Sekhose-isa Dr.T.Ao taküm ajanga nüburtem talisa tanü putu lanu asensortem tangazüksü jenti, lir kechiaser pa ya asayar mongin ka dang masü saka pa ya shisaliokdak classroom nunga temelung tenendak aser techira liasü aser ibaji ajanga pa tazüngba nunga jenjang tulu tongtetnaji asünung tanü Naga nunger lanurtem rongnungia Dr.T.Ao ama kanga dang nungtaker ta lemsatep.

Impur Baptist Arogo Pastor Rev.Dr.Akok Amer-i Tsüngrem nungi lenisüba jazüka

sarasademer sentong tenzük, ABAM Executive Secretary Rev.Temsü Jamir-i Dr.T.Ao Impur nung lia Impur Ground nung asayaba aser ABAM-i Impur ground Dr.T.Ao Ground ta ajatsü asatetba indang lemsatep.

Sentong nungsa Nagaland Neteran Football Association Tir Wb.Anthony Ngullie IAS, Ao Senden Tongti Zülur Wb.Imtipoyim aser Mokochung District Football Associati Tir Wb.N.Akok Lkr parnokia shilem agia jembiba den Impur nung alirtemi iba sentong omen "Where Legends Begin" ta asüba ken aten aser iba sentong Clark Memorial Higher Secoundary School Principal Wt.Chubainla ketdangsüba nung agi. Tanü sentong nung Dr.T.Ao Jabaso Wb.Talikok Chang dena liasü.

Sentong temer kelen ano NFA-11 aser ABAM-11 tsüngda Football match ka asaya-a sentong kanga dang tobur junga agia liasü.

Pakistan hockey team captain nem tenokdangba agütsüba agin

Tsüklai/February 21, 2026 (Agencies): Pakistan Hockey Federation (PHF)-i national hockey team captain Ammad Shakeel Butt nem küm ana atema tenokdangba agütsür aliba Pakistan sorkari agintsüogo. Iba tenokdangba agütsüba ya ozüng alema lir ta shia agintsüogo.

Brehostibarnü mapa metoktsü tsüngda PHF tir Tariq Bugti-i, Butt nem küm ana atema tenokdangba agüja liasü. Tawa Australia nung oa asayaba mapang team junga anepalu masüba atema PHF aitsüba sülen Butt nem tenokdangba agüja liasü.

Ajisüaka interim PHF tir Muhuydin Ahmed Wani, shiba patron-in-chief PM Shehbaz Sharif-i shima liasü, pai Bugti-i iba telemtetba agiba ya magi kümdaktsü aser ashiba agi, iba ya ozüng alema lir.

National team Australia nung oa asayaba mapang mepetmesü adoka Airbnb nung anentsüsa akümba sülen Bugti-i mapa tokja liasü. Pakistan Sports Board (PSB)-i Canberra

nung team five-star hotel nung anentsü atema PHF nem sen million 10 agütsüba sülena iba ya ataloka liasü.

PM Sharif-i Bugti indang resignation agizük aser PHF adhoc tir asütsü atema Wani shim aser Director-General asütsü Brig Musratullah shima liasü.

Team Bodhbarnü kidangi meyipa aruba sülen Butt aser tanga asayar tejentemi PHF aser team management den inyaktsü memulungba lemsatepa liasü. Butt-isa, Australia nung oa asayaba mapang timtem ajangshiba indang media den mejembitsü asoshi parnok amokmerenba indang lemsatep, koba ajanga pa nem küm ana atema tenokdangba agütsü.

Butt-i PHF aija ashiba agi, asayartem masaya tsüngda kitchen aser chipo aonpu ajak merekmejutsüsa aküm.

Kasa mapang nung iba mepetmesü atema Bugti-i PSB dak tai tongloktsü aser ashiba agi, Board-i iba asayamung atema inyakyim ajak achayanga laisü.

Neymar taküm küm tatemlen asaya nungi anentsü akok



Tsüklai/February 21, 2026 (Agencies): Brazil nunger nungtugu asayar Neymar, shibai pa lanuwa asayaba club Santos den taoba ita tenangzüktepba yanglushiogo, pai ashiba agi pa taküm küm tatemni asaya nungi anisüngzüksü akok.

Arishi küm 34 tain forward sayar ya 2025 küm January ita pa lanuwa asayaba club Santon-i meyipa ao aser parnok Brazilian top flight nungi relegate mesüi asayaba nung pai tongtibang shilem agia liasü. Pai par team taoba asaya pongu nung goal pongu idaktsüogo.

Ajisüaka Neymar, shiba küm shika yiruba ajanga junga masayateti timtema arudar, pa

taküm World Cup nunga asayatetsü masayatetsü mejangja.

"Ni kecha ataloktsü memetet aser taruba küm atema-a kecha memetet," ta pai Brazilian online channel Caze dang ashi.

"December ita nung asaya nungi anisüngzüksü akok. Ni küm ka nungi küm ka ta dang lia arudar."

"Taküm ya Santos atema dang masü saka Brazilian national team atema aser kü atema-a kanga tongtibang küm ka lir, kechiyong taküm World Cup asayatsü," ta Neymar-i ashi.

Neymar, shiba tawa temekok surgery takok ngua agiogo, pai Brazil team nungi asayaba mapang goal 79 idaktsür lir, koba Brazil nunger asayartem rongnung goal timtiba idaktsüba asütsü, ajisüaka pa 2023 küm October ita nungi national team nungi khen danga asaya mali.

Brazil manager Carlo Ancelotti-i, World Cup atema kanga anema aliba asayartem dang team nung züngoksemtü ta shiogo. Taküm World Cup ya Canada, Mexico, aser United States nung June 11 nungi July 19 tashi asayatsü lir.

STATE OSANG :

Tapak 1 nungi...

AKM 2026-2029 kümsük asoshi ketdangsürtemi...

Iba sentong nung taoba tatong tir, Onenpong menden liasü. Mokochung Town Baptist Arogo Pastor, Monglier Tzüdir-i AKM ketdangsür tejen & tasen ajak asoshi temoatsü meshia sarasademtsü.

AKM Education Promotional Trust Award Convener, S.T Nokdang Longkumer aser AKM Corpus Fund Committee nungi taoba convener, Impa Longkumer tenadia mapang tatsütsü agia ajangshiba otsü kar shia AKM ketdangsürtem ayongzük.

Sentong temer iba osangbeneri taoba AKM tir, Lanutoshi Aier dang "iba sülen na kechi inyaktsü bilemdar?" ta metetnüa asüngdangdang,

"langka ka inyaktsü telemtetba agiogo, saka kechi inyaktsü'ar tangbo mashinür", ta menürema langzü.

AKM 70 buba inti mungdang taoba Jan ita 13-15, 2026 Chungtia yimdak amung aser taruba AKM centenary küm mungdangji 2029 nung Waromung yimdak amungtsü, ta osang ajanga angazüker.

2026-2029 kümsük asoshi AKM ketdangpur aser parnok indang contact numbers-tem yangi agütsür. Tanü nungi nungdabapuri item mobile phone number-tem nung tongteprateptsü mepishir.

1. Lanulemba Longchar President Süngratsü (8837486278)
2. Bendangnangba Longchar Vice President Chungtiayimsen (7085652415)
3. Aomayang Longkumer General Secretary Waromung (8414881231)
4. Arenlong Imsong Asst. General Secretary Longkong (7005817532)
5. Imlokokba Kichu Education Secretary Khensa (8731831742)
6. Akangnungba Aier Social & Culture Secretary Longpa (8415853545)
7. Watinungsang Longchar Sports Secretary Aonokpu (7005777577)
8. Nokshimetem Jamir Info. & Publicity Secretary Longmisa (8415825732)

Union MoS Bambhaniya-i Nagaland...

Khonoma Village Chairman-isa Government High School nung Higher Secondary (Class XII) class maliba khuret lemsatep aser New Education Policy kübok ajungkettsü mepishi.

Tanü MoS Bambhaniya-isa Government Middle School, Kuda village semdangdang la pelashishia agizükba sentong tajung ka ayonga agia liasü.

La Kuda village-i aruba

asér school-i sentong tajung ayonga agiba atema pelaba metetdaktsü.

Prime Minister Narendra Modi lenisüba kübok Northeastern state tem nung shisaliok aser terenlok nung temulung kanga agütsür. Sorkari "Atmanirbhar Bharat" mangdang kübok NE renlokdaaktsütsü aser 'Vocal for Local' products ajungketer ta Bambhaniya-i ashi.

Sorkari "Sabka Saath,

Sabka Vikas, Sabka Vishwas, Sabka Prayas" tangatetba nung sensakertem, lanurtem, aluyimertem aser tetsürtem ajungkettsü atema akokba tashi meranger ta laisa ashi.

"Asen tanurtem ya India yangertem lir aser tia yanglurtem. Linük nung school tem modernized asür aser iba ajanga kaketshirtem nem facilities tajung aser quality education agütsür" ta laisa ashi.

BILEMDANGANG

"Pei ajung dang asartem nungi pila liang."